

Et circum adfusi coetus utrique suorum
 Alta petunt pariter: gemino lux aurea vultu
 Emicat, & late ætherias procul imbuit auras;
 Namque Venus, summique altus Regnator olympi
 Frontibus ingenuis divinum adflarat honorem.
 Jamque locum attigerant avidi, camposque beatos.
 Protinus adsurgunt venientibus agmina Divum
 Omnia, & Heroes consanguinitate propinqui
 Procurrunt, junguntque manus, atque oscula figunt,
 Quos Venus adfusus discriminat: area campo
 Se pandit vacua in medio, partesque recedunt
 Divisi in geminas Heroes, at aggere ab alto
 Adstant, spectantque insuetam Numina pompam.
 Hinc Divæ ad nutum campo procedit aperto
 Corarides juvenis, Pisaurias inde puella,
 Ille gravis vultu, hæc suffusa pudore modesto.
 Interea auratam pharetra e fulgente sagittam
 Aliger Idalius deprompserat, & contentis
 Aptarat nervis, flexumque adduxerat arcum.
 Ergo locum capit, & postquam videt esse propinquos
 Emitterit nervis telum stridentibus: auræ
 Dant sonitum, celeri cuspis volat ignea cursu,
 Perque latus juvenis, perque intima pectora ad imum
 Cor penetrat; tum deinde iterum progressa per auras
 Evolat, & simili percellit vulnere sponsam.
 Dant plausum Superi: at geminis novus æstuat ignis
 Pectoribus, flamma ardenti prorumpit ab ore.
 Illi autem accedunt; æterno & fœdere dextras
 Conjungunt Divis tot testibus, accipiuntque,
 Dantq; fidem, & dulces spondent celebrare Hymenæos.
 Tum vero accurrit, geminis & florea ferta
 Frontibus imponit juvenis, qui raptus ab Ida.
 At Charites blandæ, & Nymphæ, aligeriq; frequentes
 Alternant choreas pueri, atque incendia miscent.